



Inatsisartut Ilaqutariinnermut ataatsimiititaat

Maani

**Pineqartoq: UKA 2006/34-mut – pisortanit ikiorsiissutit pillugit Inatsisartut peqqussutissaattut siunnersuummut - atatillugu apeqqutinik qulaajaaniutaasunik assigiinngitsunik saqqummiussineq**

04.10.2006  
J.nr. 01.25.01/EM06-034

Ilaqutariinnermut ataatsimiititaliap 2. oktober 2006-imi allagaqarluni Ilaqutariinnermut Pisortaarfik qinnuigaa pisortanit ikiorsiissutit pillugit Inatsisartut peqqussutissaattut siunnersuummut tunngasut arlallit nassuiaateqarfigeqqullugit. Tamanna pillugu imatut ilisimatitsissaanga.

Postboks 260  
3900 Nuuk  
Oq/tel +299 34 50 00  
Fax +299 32 45 47  
[ilapi@qh.gl](mailto:ilapi@qh.gl)  
[www.nanog.gl/ilapi](http://www.nanog.gl/ilapi)

Apeqquut 1-imut

Inuit inuussutissarsiutigalugu piniartutut allagartallit pisortanit ikiorsiissutit pillugit Inatsisartut peqqussutissaattut siunnersuut malillugu taamaaqataanik pisinnaatitaaffeqarlutillu pisussaaffeqarput aammalu pisortanit ikiorneqarsinnaallutik pilersornissaminnut aningaasartuutinullu aalajangersimasunut § 4 malillugu aammalu pissutsini immikkut ittuni § 20 malillugu allatulli ikiorneqarsinnaallutik. Assersuutitut oqaatigineqassaaq § 8 malillugu sulisussatut piareersimasuussammata.

Apeqquut 2-mut

Akissutissami atugassatut Aalisarnermut, Piniarnermut Nunalerinermullu Pisortaarfip Piniarnermut immikkoortortaa ilisimatitsivoq inuussutissarsiutigalugu piniartuunermut uppernarsaatitut allagartaqarnissamut piunnaasut inuk pineqartoq inuiaqatigiinnut kalaallinut aalajangersimasumik atasuussasoq, inuit nalunaarsorsimaffiannut allatsissimassasoq kiisalu ukiuni kingullerni marlunni tamakkiisumik akileraartussaataasimassasoq. Tamatuma saniatigut ilanngaattissat ilanngaatigereernagit piniarnermit aalisarnermillu isertitai isertitaasa tamakkiisut minnerpaamik 50%-erissavaat.

Pisortanit ikiorsiissuutit ilanngatissat ilanngaatigereernagit isertitanut tamarmiusunut ilaapput, taamaammallu oqartoqarsinnaanngilaq aalisartut piniartullu tamanna patsisigalugu inuussutissarsiutigalugu piniartuunermut allagartartik uppernarsaat annaasinnaanngikkaat. Tamatumunngali tunngatillugu oqaatigineqassaaq immikkut akuerineqarnissamik qinnuteqartoqarsinnaammata taamaalilluni inuussutissarsiutigalugu piniartutut allagartaq uppernarsaat pigiinnarneqarsinnaalluni soorlu ataasiaannartumik ataavartuunngitsumik ikiorserneqassagaanni.

Apeqquut 3-mut

Pisortanit ikiorsiissutit pillugit Inatsisartut peqqussutissaattut siunnersuummi naatsorsuutaanngilaq inuussutissarsiutileqatigiit immikkut toqqakkat akissarsiatigut tapiiffiqineqarnissaat. Inatsisartut peqqussutaanni tamanut atuunniartussaasumi naapertuuttuussanngilaq inuussutissarsiutileqatigiinnut ataasiakkaanut imikkut malittarisassiornissaq. Ilaqutaariinnermut ataatsimiititaliap piniartunut aalisartunullu taamatut immikkut malittarisassiornissaq kissaatigippagu Ilaqutariinnermut Pisortaqarfik aalajangiullugu isumaqarpoq immikkut ittumik peqqussusioraanni pitsaanerussasoq.

Apeqquut 4-mut

Siunnersuummi § 5-ip oqaaseqaatitaqannginnera kukkuneruvoq aaqqineqassaarlu.

Apeqquut 5-imut

Pisortanit ikiorsiissutit pillugit Inatsisartut peqqussutissaattut siunnersuut KANUKOKA-mut tusarniaassutigineqareermat siunnersuullu Inatsisartunut nassiunneqareermat Namminersornerullutik Oqartussat kommunillu kaattuffiata 2007-imut ataatsimut tapiissutit pillugit isumaqatigiissummi isumaqatigiissutigisimavaat aningaasat suliniuteqarnissamut pilersarusiornermut atugassat. Tassalu aningaasalersuineq pillugu KANUKOKA isumaqatigiissuteqarfigineqareersimavoq Naalakkersuisullu annerusumik iliuuseqalersaanngillat.

Tamanna takuneqarsinnaavoq ataatsimut tapiissutit pillugit isumaqatigiissummi immikkoortoq 11-mi.

11. Pisortanit ikiorsiissutit pillugit Inatsisartut peqqussutaat – Suliniutissatut pilersaarutit suliarinerannut allaffissornermi aningaasartuutit.

Inatsisartut peqqussutaanni nutaami allassimavoq kommunit suliniutissatut pilersarusiussasut, tamannalu siornatigut malittarisassanut sanilliullugu nutaajuvoq.

Illuatungeriit isumaqatigiipput ataatsimoortumik tapiissutit 2007-imiit 700.000 kruuninik qaffanneqassasut.

Siunnersuut Inatsisartunit akuerineqassanngikkaluarpat ataatsimoortumik tapiissutit amerlaqataanik ikilineqassapput.

Apeqquut 6-imut

Kommunit oqimaarsartinneqarnerulernerat siunnersuutip kingunerissanngilaa.

Apeqquut 7-imut

Aningaasat inatsisaanni konto 30.01.03-mi 750.000 kruunit immikkoortinneqarput inunnik isumagininneq pillugu inatsisip piviusunngortinnissaanut atatillugu kommuni sulianik suliaqartuusut pikkorissartarnissaannut.

Apeqquut 8-mut

Inuit 80-it peqataanissaannut aningaasaliisoqarpoq.

Apeqquut 9-mut

Ilaqutariinnermut Pisortaqaarfik kommunit inunnik isumaginninnermut malittarisassanik aqutsinerat nakkutigissallugu pisussaataavoq, tamatumani ilanngullugu pisortanit ikiorserneqarneq pillugu Inatsisartut peqqussutaat, tak. § 1, imm. 2 inunnik isumaginninnerup aqunneqarnera aaqqissugaaneralu pillugit Inatsisartut peqqussutaanni nr. 11-miittoq. Inunnik isumaginninnermut tunngatillugu nakkutilliinermi siunertaavoq kommunit inunnik isumaginninnermi inatsisini malittarisassanik malinninnissaat aqutsinermilu malittarisassat malillugit aqutsinissaat nakkutigissallugu.

Apeqquut 10-mut

Ilaqutariinnermut Pisortaqaarfik periarfissaqaanngilaq kommunip inunnik isumaginnikkut inatsisit malinngippagit pineqaatissiinissaminut. Ilaqutariinnermut Pisortaqaarfiup kommunip inatsisit malinngippagit nakkutilliilluni nalunaarusiornermini nakkutilliilluni tikeraarnerit tamaasa pisartumi tamanna uparuarsinnaavaa. Nakkutilliartoreerluni nalunaarusiaq kommunalbestyrelsimut Kommuninullu nakkutilliisoqarfimmut nassiunneqartarpoq.

Apeqquut 11-mut

Siunnersuummi § 13, imm. 2-mi takuneqarsinnaavoq aningaasartuutit aalajangersimasut suut pilersornerlu suna pisortanit ikiorsiissutinit akilerneqartarnersut. Tassalu pisortanit ikiorsiissutigut akilerneqarsinnaapput pisortanit ikiorserneqartup ilaqaasalu pisariaqartumik ikiorsigaanerat kiisalu ineqarnermut, ulluinnarni aningaasartuutitut aalajangersimasumillu aningaasartuutitut allanut aningaasartuutit naapertuuttut. Atukkanut aningaasartuutit tassaapput atuneq malillugu akilertakkat, soorlu innaallagialu, imeq kiassarnerlu. Aaalajangersimasumik aningaasartuutit isigineqarput aningaasartuutit pisariaqavissut, tamatumani ilanngullugit ulluunerani paaqqinnittarfiit sillimmasiutillu.

Apeqquut 12-mut

Pissutsini immikkut ittuni ikiorsiinnermut malittarisassat eqqarsaatigereerlugu kommunalbestyrelsinut naliligassanngortitaapput. Tassami siunertaammat §§ 20-23-mi malittarisassat eqaatsuussasut pisariaqartitanilu assigiinngitsuni atorneqarsinnaassallutik. Kommunilbestyrelsit

naliliiffiginnaangisaannik malittarisassiortoqassappat isumaasoq uniorlugu inuit pisariaqartitsivissut ikiorserneqarsinnaajunnaassapput.

Apeqquut 13-imut

Akissuteqarnermut atugassatut Sulisoqarnermut Inuussutissarsiutinullu llinniartitsinermit Pisorta qarfiup ilisimatitsissutigaa nuulertorsinnaanermut akiliutit aningaasaliissutigineqartartut sulisussat sumiiffimmiit sumiffimmut nuulertorsinnaanissaat siuarsarumallugu. Naalakkersuisut nunap immikkoortuani sulisussat aalajangersimasunik piginnaasallit amigaatigineqalerpata sulisartunut allamik suliaqariartorniarlutik allamut nuunniartunut aningaasanik ikiorsiisinnaapput. Ikiorsiissutit tunniunneqassapput inunnut isumaqatigiissutit atuuttut malillugit suliffeqaleriartornermut suliffimmullu atatillugu inissaqartitaanermut periarfissaqanngitsunut. Sulisartutut isigineqarput inuit akissarsiat pillugit isumaqatigiissut isumaqatigiissullunniit alla naapertorlugu sulisitsisumi atorfeqartut taassumalu malittarisassiaanik atuisuusut.

Siunnersuummi § 21 naapertorlugu nuunnermut ikiorsiinermit ilaavortaaq qinnuteqartup ilaquataasalu ineqarnikkut inuussutissarsiornikkullu pitsaanerusunik atugaqalernissaat. Siunnersuut malillugu nuunnermit ikiorserneqarnissamut piumasaavoq qinnuteqartoq aapaaluuniit katissimasaa, nalunaarsukkamilluunniit inooqatigisaa aningaasartuutit akilernissaannut periarfissaqanngitsoq. Tamatumani pisariaqanngilaq pineqartoq suliffeqalernissamut piareersimanersaq.

Apeqquut 14-imut

Akissuteqarnissamut atugassatut Akileraartarnermit Pisorta qarfik ilanngussaqaarsimavoq. Tassunga tunngatillugu ilisimatitsissutigineqarsinnaavoq pisariaqartitsivinnee pillugu ikiorneqarneq pisortanit ikiorneqarnermit ilaammat.

Utoqqalinersiutitut, siusinaarluni pensionisiatut, suleqqissinnaangorsaatitut sulliffeqarallarnersiutillu, ilinniarnersiutitut, annertuussusilerikkamik ikiorsiissutitut pisariaqartitsivinnerluunniit pissutigalugu ikiorsiissutit tunniuttakkat isertitanut akileraaruteqaataasussanut ilaasussaapput. Isertitanit akileraarutit pillugit inatsimmi § 13 24-lu assigiigatik.

Pisariaqartitsivinneeq patsisigalugu ikiorsiissutinut tunngatillugu katillugu akileraarutissaq isertitap taassuma annertoqataanik apparneqassaaq. Allatut oqaatigalugu pisariaqartitsivinneeq patsisigalugu ikiorsiissutit aallaqqaatitut akileraarutaasussaangillat. Isertitanit akileraarutit pillugit inatsimmi § 34 c.

Pisortanit ikiorsiissutit ataasiaannartumik ikiorsiissutitut, nutsernermi ikiorsiissutitut, ilisiartornermi ikiorsiissutitut, angerlarsimaffimmi ikiorsiissutitut angerlamullu angalanermi ikiorsiissutitut

aningaasalerneqarpata isertitat akileraarutissat naatsorsorneranni ikiuutit ilanngunneqassanngillat.

Apeqqut 15-imut

Siunnersuummi § 23 malillugu illerfimmik angallassinermut aningaasartuutit matuneqarsinnaanngillat.

Apeqqut 16-imut

§ 27, imm. 1 nr.1-ip oqaasiliornera kukkuneqarpoq. Oqaaseqaatini aalajangersagaq eqqortuuvoq. Oqaasertalernera iluarsineqassaaq.

Apeqqutinut 17-imut 18-imullu

Ilaqutariinnermut Pisorta qarfiup pisortanit ikiorsiissutit pillugit nalunaarut 1. januar 2007-imi atortuulersussaq suliaralugu ingerlappaa. Tamatuma peqatigisaanik ilitsersuut aamma 1. januar 2007-imi atortuulersussaq suliarineqassaaq. Pilersaarutaavoq kommunit tamakkuninnga suliaqartartui januar 2007-imi pikkorissartinneqassasut. Ilaqutariinnermut Pisorta qarfik isumaqarsimavoq decembarimi pikkorissartitsinissaq naapertuutissanngitsoq, aammalu pikkorissarnerup sukumiinerusumik pilersaarusiornissaanut pisortanit ikiorsiissutit pillugit Inatsisartut peqqussutissaattut siunnersuutip akuerineqavinnissaa utaqqimaarneqarluni. Siunnersuutip aappassaaneernissa pingajussaaneernissaalu kinguartinneqassappata Ilaqutariinnermut Pisorta qarfik maleruagassiornissamut pikkorissarnerullu pilersaarusiornieranut tunngatillugu tatineqarnerulissaaq, tassami tamatuma suliarinissaanut siunnersuutip akuerineqavinnissaa apeqqutaammat, tamatumani ilanngullugu aaqqiissuteqaratarsinnaanera.

Apeqqut 19-imut

Pitsaanngilluinnassaaq siunnersuut tamakkerluni ataatsikkut atuutilinngippat. Tamatumuunakkut innuttaasut kommunillu paatsiveerusimaarutigilissavaat malittarisassat suut qaqugulu atuunnersut. Atuutilerfissaa kinguartikkumaneqassappat siunnersuut tamarmi pineqartariaqarpoq.

Inussiarnersumik inuulluaqqusillunga

Aleqa Hammond